

光緒重修安徽通志

重修安徽通志卷二百十七

人物志

忠節十六

六安州

宋王玠英山人官蘄州守紹興二年蘄黃鎮撫使孔彥舟橫暴不法朝廷將以兵執之彥舟遂叛玠率眾戰敗投磯死妻馬氏妾李氏田氏皆罵賊死詔贈蘄黃鎮撫使立廟龍眼磯

六安州志

明徐公輔六安人從太祖渡江以功爲右元帥從征陳友諒戰

死鄱陽湖追贈東海郡侯肖像康郎山廟

明史趙德勝功臣表

姚善字克一六安人

明史安陸人

初姓李洪武中由鄉舉歷官蘇州

府知府建文四年詔兼督蘇松常鎮嘉興五府兵勤王兵未集

燕已入京爲麾下縛以獻不屈死

明史本傳六安州志

國朝乾隆四十一年

賜諡忠節

勝朝殉節  
諸臣錄

按明史言善安陸人六安州志據七修類稿作六安人又云  
今六安李姓譜稱善爲遷六之六世祖與史云本姓李符今  
存之以俟考

徐瑾六安人由歲貢爲鄞縣丞正統中處州盜起瑾率壯士邀  
擊數有功援兵不至死之朝廷優卹蔭其子行入監

一統志

劉會字嘉會英山人正統乙丑進士官戶部主事己巳北征同  
年友主事羅紳當扈從適母病會請代行死於土木之難景泰  
初敕獎蔭其子入監

一統志

王國祥霍山人嘉靖閒有倭船漂至漳州倭僅二十七人無所  
歸遂自閩而浙由浙而江南殺戮自恣時承平日久罔敢禦者

渡江至霍國祥與兄國禎奮力挺戰擒其副賊國祥中矛死國

禎怒鼓勇復仇乃盡殲之事聞以義勇旌

六安州志

張璧六安人襲福甯衛指揮簽事任烽火寨把總破倭有功嘉

靖三十八年倭寇巖前戰死

一統志福建名宦

王芬字子英國祥子也父死時僅七齡撫戟長泣有遠志長入

成均喜談兵周知天下扼塞以薦落文階署都指揮僉事從征

播州楊應龍獨破三關隘深入被流矢歿於陣蔭一子廬州衛

前所千戶

六安州志

喬允遷字升之其先世泗人爲六安衛指揮遂家焉允遷襲職

崇禎壬午流賊夜襲城允遷領步卒接戰爲賊所誘戰死

六安州志

馬獻圖六安人甯夏籍世襲錦衣衛指揮同知闖賊據關中誘

之降不屈繫至山西被殺

甘肅通志

國朝乾隆四十一年

賜諡忠節

勝朝殉節  
諸臣錄

邱壯猷六安人崇禎壬午以參將移鎮太湖張獻忠營於天堂

山壯猷夜遣兵襲之多所斬猷旣而部卒逼賊潛引入城血戰

死

六安  
州志

國朝乾隆四十一年

賜諡烈愍

勝朝殉節  
諸臣錄

王良鑑霍山拔貢任嘉魚知縣崇禎癸未獻賊陷城抗節死贈

卹有差

明史徐  
學顏傳

國朝乾隆四十一年

賜諡烈愍

勝朝殉節  
諸臣錄

張國正字定寰其先世滁人世襲六安衛千戶因家焉國正升

指揮崇禎乙亥流賊犯六安國正射卻之壬午賊夜襲城入國

正巷戰流矢中肩而死子斯美殉焉

一統志

國朝乾隆四十一年

賜諡烈愍

勝朝殉節諸臣錄

劉世芳字穎玉英山拔貢歷任廬陵宛平丞升新河知縣超擢  
濟南僉事未至任甲申三月流賊陷京師仰天慟哭以頭觸柱  
喉血死

一統志

國朝乾隆四十一年

賜諡節愍

勝朝殉節諸臣錄

劉良佐六安人官指揮崇禎壬午流賊攻城兵變戰死

江南通志

國朝乾隆四十一年

賜諡節愍

勝朝殉節諸臣錄

陶廣明原籍壽春世襲六安衛鎮撫因家焉流賊陷城廣明督

戰力屈赴水死

江南通志六安州志

國朝乾隆四十一年

賜諡節愍

勝朝殉節諸臣錄

梅國秀六安諸生崇禎乙亥為賊所獲脅之降罵甚厲賊怒殺

之

江南通志

黃金度字國顏六安諸生崇禎壬午流賊攻城破產與弟金文

分守城陷被執大罵賊怒以髮繫馬曳之而走力脫躍城壕中

四面射之皆不中溺死直立水中髮指背裂面如生金文亦殉

難死妻徐氏哭死

一統志

江原洞六安諸生練鄉勇協守城池城陷被執不屈蔽舌刎目

而死同州諸生田呈芳自刺其女與賊鬪死者民劉鉉與賊戰

賊劈其首解帛裹之復殺數賊而死邱民達亦罵賊死

江南通志

安州志

黃中理號石虹霍山諸生崇禎壬午率家僮禦賊遇伏刺洞其

脇腸出而死同邑朱貞及吳時道張大翼胡璋李懷信時際順

並殉節死

江南通志

國朝乾隆四十一年自梅國秀以下並

賜祀忠義祠

勝朝殉節諸臣錄

彭之年霍山人崇禎中歲貢流寇攻城倡義固守傾家財以贖

軍城陷死之

一統志

蕭時霖字澤及英山人天啟副榜流賊陷城罵賊死同邑康生

程子鼈率姪天禧僕丙禿殺賊數人而死又康生鄭萬善與弟

庠生萬齡罵賊死妻黃氏亦赴水死武生朱禎夜襲賊營被執



死又有段七段八者俱力戰死

六安州志

秦高者霍山人年七十七賊以其老釋之高戰手大罵賊怒殺之妻孫氏年六十八伏屍哭罵賊又殺之時同邑死者韓士昌曹士遠劉躍龍鄧學廣敖應鼎汪道中余有鯁余敬修余慎修李其龍萬雲初葉銘常楊之棟曹士達張孫姓張爲犀熊可成朱允昌李之晉周之楨金玉品汪清一程洲生劉一元劉兆文劉兆盛劉兆毅熊大羣周魁士李之郁蕭九成萬雲祥凡三十二人皆霍諸生又布衣胡璋亦罵賊死

六安州志

六安州諸生死義者尙有葛逢春李輝楊行敏王應福又有武

舉潘雲蛟百戶戴君恩俱被害

六安州志

國朝鮑友信字以誠以武進士官雲南昭通中營守備署右營遊擊犒匪亂奉調出師維西連戰俱捷賊將恆乍勦竄入小川迴

龍等地友信進攻連破四賊巢沿燒二十餘巢繼出團江斬獲甚眾尋奉調樹苗駐防行獨村坪遇伏中流矢陣亡年二十九  
奉

旨入昭忠祠子起豹以雲騎尉世襲

六安州志以上舊志

徐啟山字鏡溪六安進士授主事道光十八年出補泲河同知重築微湖大壩修韓莊閘及張阿彭口各工段調開封府下北河廳汰浮靡減供億二十三年中牟口決調牟工明年春汎河隄復決降通判咸豐三年侍郎呂賢基奏准隨同辦理團練至舒城髮賊來犯勇潰城陷啟山與賢基從容賦絕命詩赴池水殉節

贈道銜卹蔭建祠世襲雲騎尉

六安州志以下新修

聶振元六安武生成豐三年從六安營參將遇壽調防武昌省

城陷陣亡奉

旨贈外委銜祀昭忠祠

六安州志 胡肇智奏案

劉春霆字雨亭六安舉人江蘇知縣咸豐三年守江甯城城陷

巷戰陣亡

贈同知銜祀忠義祠世襲雲騎尉

六安州志

鮑開運字春巖六安人由蔭生主事改選湖北黃梅知縣辦賑

水災加知州銜咸豐三年調廣濟先是奸民聚眾逐官知開運

至將治之難作遂遇害蒙

恩卹給雲騎尉世職

六安州志

徐恆占六安人咸豐三年聞安慶城陷知禍將及聚家人曉以

大義闔門均縊死

六安州志

蔣槐斗英山增生咸豐三年帶勇禦粵匪於瓦蓋牆陣亡蔭雲

騎尉是年監生段繼光帶勇堵禦髮賊於縣南境被害於同治

七年建立專祠又文童聞立金率勇禦賊死

英山縣志

吳廷樸俞廷勳俱霍山文生成豐四年殉難已

旌卹

霍山縣志

汪蟠春字壽山六安舉人咸豐初呂賢基江忠源先後檄令帶團防堵髮逆四年州城陷蟠春病召同志密圖規復賊聞偪之不屈自刎

贈卹如例

六安州志

祝澂鑑字子青六安人員外郎咸豐四年帶勇會李元華剿太湖髮賊中伏死

贈道銜世襲雲騎尉又孫玉林朱其秀陳大海李金純吳海林姚正宏

並隨剿太湖陣亡

六安州志

羅鴻恩字錫三六安人守禦所千總咸豐四年州城陷鴻恩集十六保練勇圖之與千總王成貴監生羅興觀攻城南均死焉  
奉

旨恩卹鴻恩銀兩祀昭忠祠世襲雲騎尉是役也理問銜朱殿甲會攻城西殺傷過當後隊亂勇潰被擒子武舉慶恩救之弗及投河死賊擁殿甲入城分裂之父冠鼇聞敗自經監生傅培宗闔家遇害死城下者謝昌洪等一百八人奉

旨贈殿甲知州銜立專祠世襲雲騎尉冠鼇慶恩同祀專祠蒙

贈卹陰如例又孫廷訓郭朝珍汪金錄萬長有王其聰陳世格李永暢武舉張景奎均帶勇禦賊死孫表殺賊被執不屈死

六安州志

胡承翼六安人兵馬司吏目咸豐四年帶勇在霍山禦賊陣亡  
奉

旨贈鑾儀衛經歷銜世襲雲騎尉是年鄔全信朱序賓父子及恩騎尉

湯霖均從秦定三攻舒城踞逆中礮死勇丁死者八十餘人

州志

趙鴻猷六安武生分守太湖汛咸豐四年粵匪薄城同白洋外

委范履祥城守城陷俱遇害

太湖縣志

沈周丙英山文生成豐四年隨同知縣復城保訓導進攻太湖

陣亡

贈國子監學錄銜世襲雲騎尉是年監生張啟棖同弟啟祥啟禮典史

馮禮彬帶勇堵剿髮逆陣亡奉

旨照千總例優卹

英山縣志

呂自品六安文生總辦八保團練咸豐五年在毛坪堵禦髮逆

斃賊無數會昏暮勇潰自經又梅必恆余國江彭文忠熊正國

衷與教袁謙雲汪鳴仕均於是年率勇禦賊被害同死者凡百

餘人

六安州志

段江英山監生著有曹倉書屋文集咸豐五年帶勇擊髮賊遇

害

英山縣志

曹綬卿字紫亭六安監生咸豐六年隨父遠榮克舒城解呂亭圍以功用府經歷縣丞從秦定三攻桐城將駐義津橋而桐城知縣成福調其勇往樅陽綬卿自赴招之賊猝至苦戰竟日綬卿死之合營殲焉桐城人合骸骨百八十餘具葬之稱忠義大冢事聞

謝懋儀衛經歷世襲雲騎尉綬卿死後遠榮病歿於店埠軍營蒙

賜葬蔭子入監

六安州志 許丙楷撰忠義大冢碑記

王象乾六安人咸豐六年帶勇擊賊被執死

兩江忠義錄

劉遐志霍山人千總練十五保民團守隘拒髮賊有功咸豐六

年調攻潯山太湖踞賊同八品軍功趙光揚陣亡均蒙

旌卹

霍山縣志  
兩江忠義錄

王修紀王德秀俱英山監生同衛守備王賓國勇目王家齊吳宗貴吳元發王細芳王甲午等禦賊陣亡於同治十一年

旌卹

祠坊  
黃銜  
奏案

王桂修英山監生成豐六年遇賊暫作偽示不從被害

英山縣志

徐寶卿六安增生咸豐四年粵逆踞州城同西鄉團練攻之不

克嗣攻克舒城解桐城圍保訓導七年布政使李孟羣劄委偵

探同弟寶祿行至蘇家埠遇賊均鬪死

六安州志

江繼陶字皋臣六安監生嘗倡捐賑饑代贖鬻婦咸豐四年帶

勇同李元華復英山加理問銜七年從李孟羣剿霍山在麻埠



陣亡奉

旨優卹又千總鄧子壽六品軍功江希喬亦從李孟羣剿賊陣亡江希

文亦帶勇在霍山被執死

六安州志

尹寶銓字定齋六安舉人咸豐三年督理練務助克舒城保知州七年籌防六安髮賊竄州居民棄城去莫能禁有勸行者意堅不可奪題絕命詞於樞柱自縊於州治大堂賊疑其州官也

解而復蘇張目大罵被害世襲雲騎尉

六安州志

史秉文六安監生督練築堡拒賊給六品軍功咸豐七年堡破同死者軍功王孝量史先知余紅桂等五百餘人子傳依八品軍功救父被害事聞

旌卹

六安州志

聶炳章六安武生咸豐七年同堂兄炳青姪宏祥湯隆元翁正

周起練剿捻同時被害已

旌六安  
州志

苗讓六安人咸豐七年同胡祝三鮑采芹許紹聖等二十二  
人隨知州率練堵剿均陣亡已

旌又陳於書丁張定黃金科周志義吳登榜陳文泰並從李元華剿賊

陣亡六安  
州志

陸桂星六安增生咸豐七年督練攻踞城賊被執死又監生張  
啟忻同鄭林帶練攻城陣亡監生沈希祥在連城販監生吳乾  
宇在胡家橋文生陳爲政在官亭均率勇堵賊遇害朱九元李  
學序禦捻茅坦廠黃其中黃廣明黃廣文黃廣澤黃大力劉義  
長汪炳發孫廣湛鄒春長費紹典及李登有等七人禦髮逆於  
山王河鎮周漆等五人在毛坪徐秉成等三人在徐家集陳宏

度張永綬張永全張鳳翔陳元發王爾道在陶家河萬惟一在  
河西陸文嵐在長嶺童生胡修和胡炳陽在戴家廟張正甲在  
查家墩監生黎金門徐元良趙連城在固縣寺許福許升在施  
家橋理問銜汪錦毀家募勇在蘇家沖俱率眾禦賊陣亡

六安州志

兩江  
忠義錄

趙爲長周銀倉孫華瞻張金有左世卿何敘堂邵承謨李安純  
陳本裕張志貴蘇廷珠張彩貴王家乾徐康德徐康全鳳連城  
董名燦李從發吳朝立陳爲信鳳興貴張斯勤陳大寬俱六安

人先後辦理團練殉難

六安州志

錢德基六安人咸豐七年同弟富基帶團攻賊不克均自縊高  
人伊楊自謙均闔門絕粒死謝朝萬張統傳陳士坦陳體忠潘  
譽監生李肇元邱純俱全家殉難又廩生曹必羅率家人自沈

於淵

六安州志

王道長六安文生同武舉樂定安從九王春生童生王慶雲王錦雲楊早生軍功黃金許立讓醫官李萬青均以帶練禦賊陣

七

六安州志

王際英六安文生成豐七年帶練禦賊同王樂齋王高長均陣亡又霍純李成仁監生何文斗童生何國瑞鮑文獻鮑文成鮑宜瑋趙梧生俱帶練禦賊死之袁景帶練扼賊於河夜半賊船猝至眾未集景同陳永倉抵禦均中礮死

六安州志

劉春山六安監生成豐七年禦賊被害子心如心緒心海俱帶練攻州城被執死

六安州志

王家睦六安人咸豐七年粵逆竄六安家睦率勇禦賊被圍力戰死子旭懷旭同旭前旭陶復集眾禦賊一門殉難是年有諸

生謝調梅民人王陞田陳開文陳祺文俱率勇禦賊陣亡調梅

一門殉義難兩江忠

方元珍王祥念俱英山人咸豐七年帶勇禦賊陣亡又胡允聰

胡太生殺賊力竭死英山縣志

吳光漢霍山監生八品銜咸豐七年督團禦髮逆於縣東七星

寨力戰陣亡同死者五十餘人均

旌卹霍山縣志

劉永靖劉長川霍山人父子並以團練功給八品銜咸豐七年

髮賊踞縣城李孟羣自楚來剿靖率長川督練前驅力戰俱死

之已蒙

旌卹霍山縣志

俞道清霍山增生咸豐三年髮賊竄霍山道清區畫保甲團練

防堵七年從李孟羣帶團攻城不克被劊死同時廩生吳應煥  
廩監生汪翼豐軍功曹公舉均陣亡是年廩生劉長泌附生程  
汝章督團殺賊掃帚河死之廩生汪昌沛在梅子關廩生沈道  
清軍功吳玉瓏在七星巖廩生吳應輝在佛寺嶺廩生汪若疇  
附生王新桂軍功王載質王宇全在河口寺增生程青雲附生  
王暨在鎖口山附生杜文聚率子軍功道周八品銜劉永掄在  
拔刀砦監生胡錦春在磨刀砦附生胡培才監生胡嵐峯胡培  
心軍功方玉川在虎形地軍功曹國政鄭太和金耀廷童生金  
耀春金希海在管家渡軍功劉永佛在戴家河童生孫長清金  
仰全在三石嶺童生吳應炳在新店河監生劉良德在五保熊  
金山在太陽保從九品汪文貽附生張駛遠在縣城馮作仁在  
指封口俱督團禦賊陣亡許璧重張駛遠闔門殉難王履和亦

禦賊死之均蒙

旌卹

霍山縣志

王人佑霍山文生與監生何象賢黎正珠軍功汪文蔚金仰觀  
李士銓趙无揚均以帶勇禦賊陣亡自咸豐七八兩年凡禦賊  
死者黃坤齡等八百六十三人均蒙

旌卹

霍山縣志

王其瑩六安人候選州判父秀毓官雲南騰越同知其瑩隨任  
卽館武定州幕咸豐八年回匪蕭逆犯武定州城其瑩助知州  
金耀遠督練堅守城陷與六品軍功監生楊豫恆童生楊金官  
同死之

六安州志

金耀遠英山進士雲南知縣署鎮南州擒獲逆首蕭肆善咸豐  
八年署武定直隸州蕭逆餘黨來犯城陷耀遠與胞弟廩生熙

這均死之一門殉難者三十餘人

英山縣志

周啟運六安人咸豐八年帶練禦賊賊圍其莊舉家被焚死又

江天佑在流波疇朱恆泰在謝家橋均各帶練禦捻被執死

六安志

蕭方翥英山人咸豐八年禦髮賊大坳溝被害又陳維德亦帶

勇禦賊聞賊發母塚偵救被害

英山縣志

王鉞霍山文生成豐八年帶勇禦賊陣亡又監生程行棹在三石嶺軍功李秉富在虎形地軍功汪維風在棋子嶺均帶團殺賊死之並已

旌卹

霍山縣志

李文珍六安人咸豐九年帶練攻城被執死

六安州志

陳嘉猷六安人江蘇知縣降調回籍咸豐十年髮賊竄六安之



南嶽廟嘉猷集練接戰陣亡

六安州志

路成海霜山人軍功都司咸豐十年從征定遠先登死之世襲

雲騎尉

霍山縣志

張齋堂字紹平六安人雲南從九品署按司獄咸豐六年滇省回匪叛亂齋堂密絕內應省垣得保無患八年回匪圍犯騰越

十年齋堂護騰越廳兼城守至十一年陷合冢被害

六安州志

安從藻英山監生州同銜同治三年粵匪竄境捐勇防堵四十

餘日八月擊賊被執遇害世襲雲騎尉是年率團者舉生蕭宗

孝同弟宗仁宗讓監生彭元燈同弟元燮增生鄭本芝杜若陵

文生龔隆遇同知銜王德瑋民人王清吉沈德四胡浩然安道

守安道岸胡元進段商禮同弟重生均陣亡

英山縣志

王永清六安人千總同治三年從曾國荃攻江甯城陣亡

六安州志

左茂森字性田六安人貴州興義知縣同治四年署廣順知州

督勇禦苗匪勝之窮追遇伏死

贈知府

銜世襲雲騎尉

六安州志

侯鳳德六安人千總同治五年隨潘鼎新在山東金鄉縣剿捻

陣亡

六安州志

泗州

晉劉翼淮陵人衡陽太守永昌之亂起兵復晉祚力戰死之

晉書

翼王  
遜傳

梁任孝恭字孝恭臨淮人宋南豫州刺史農夫之曾孫幼孤事母以孝聞家貧無書從人借讀一編輒誦略無所遺武帝聞其才召入西省爲司文侍郎俄兼中書通事舍人爲文敏速受詔立成太清二年侯景寇偪城陷死之

梁書  
本傳

陳馬明字世朗盱眙人初從梁鄱陽嗣王蕭範爲偏裨侯景之亂據廬江之東界拒賊臨城柵荊州陷於魏歸於陳紹泰中封西華郡侯後隨周文育西征王琳於沌口軍敗力戰死之贈使

持節征西將軍郢州刺史

陳書周  
鑑虎傳

宋劉位招信縣人靖康初率眾勤王會淮上盜起部使者檄位保鄉井盜畏其鋒號橫山劉家軍建炎三年合兵復滁州卽攝州事兼滁濠鎮撫使羣盜張文孝等奄至城下位出戰中流矢死詔贈建甯節度使建廟於滁賜額剛烈命其子綱襲職

盱眙縣志

舊注宋  
史未詳

明韓成虹縣人從太祖渡江累功爲左副指揮從征陳友諒戰死於鄱陽湖追封高陽郡侯肖像康郎山功臣廟

明史趙德勝  
功臣表

胡大海字通甫虹縣人從渡江以功授右翼統軍元帥從破甯

國遂克徽州再敗楊完者取婺州破張士誠將呂珍克信州進  
江南行省參知政事鎮金華初下嚴州苗將蔣英劉震李福來  
歸大海愛其勇畱置麾下至是謀作亂請大海觀弩於八詠樓  
遣其黨跪馬前誅英過英自後以槌擊之中胸死並其子關住  
郎中王愷皆遇害大海善用兵每自誦曰吾武人不知書惟知  
不殺人不掠婦女不焚毀廬舍及死聞者無不流涕又好士劉  
基宋濂葉琛章溢皆其所薦追封越國公諡武壯肖像功臣廟

配享太廟

明史本傳

耿再成字德甫五河人從太祖克泗滁渡江下集慶以功授行  
樞密院判官守長興再守揚州取金華爲前鋒屯縉雲之黃龍  
山以遏敵衝與胡大海破石抹宜孫於處州克其城守之胡大  
海爲苗將所害處州苗帥李祐之等聞之亦作亂再成聞變上

馬從卒僅二十人賊攢槊刺之中傷墜馬死追封高陽郡公侑  
享太廟肖像功臣廟洪武三年加贈泗國公諡武壯子天璧代  
守處州拒方國珍張士誠皆有功擢指揮副使克浦城擡建甯  
走陳友定征襄陽進至西安招諭河州臨洮皆下改杭州指揮  
同知七年出海捕倭深入外洋溺水死

明史本傳

井孚盱眙人洪武三十年鎮守龍里古州洞蠻作亂燒門急攻

孚與吳得開門奮擊戰死贈正千戶子孫世襲

明史年傳

謝貴虹縣人建文初貴爲北平都指揮使與布政使張昺同受  
密命圖燕會朝廷遣使逮燕府官校燕王偽縛人庭中給昺貴  
入至端禮門爲伏所執不屈死

明史張昺傳  
泗州志

國朝乾隆四十一年

賜諡忠烈

勝朝殉節  
諸臣錄

崇剛天長人官都指揮使靖難兵至與巡按御史王彬堅守揚州出練兵守將王禮開門納燕師被執不屈死

明史陳性善傳

國朝乾隆四十一年

賜諡節愍

勝朝殉節諸臣錄

朱鑑泗州人以指揮守大甯建文元年冬燕兵自劉家口開道襲大甯城陷死之

明史馬宣傳泗州志

國朝乾隆四十一年

賜諡烈愍

勝朝殉節諸臣錄

鄧文明虹縣人甯河王愈十一世孫襲定遠侯崇禎十七年闖

賊陷京師殉節死

明史鄧愈傳

國朝乾隆四十一年

賜諡節愍

勝朝殉節諸臣錄

曾文蔚泗州人官兗州同知崇禎十五年

大兵破兗州文蔚死之

明史鄧藩錫傳

國朝乾隆四十一年

賜諡節愍

勝朝殉節諸臣錄

王養正字聖功泗州人崇禎元年進士累遷至南康府知府計殲巨寇鄧毛溪熊高一方賴之福王時進副使分巡建昌南都

覆

大兵下江西巡撫曠昭遜養正起兵拒守城陷被械至南昌死妻

張氏聞之絕粒死

肝貽縣志注明史未詳

國朝乾隆四十一年

賜諡烈愍

勝朝殉節諸臣錄

姚允恭盱眙歲貢任霍山訓導與教諭龔元祥善崇禎八年流

賊陷霍山元祥罵賊死允恭適以他出得免歸爲元祥殯斂卽

自縊又以救免越日賊又至卒死之事聞得旌

明史龔元祥傳

國朝乾隆四十一年

賜祀忠義祠

勝朝殉節諸臣錄

宋聚奎盱眙庠生崇禎十年流寇侵掠奎練鄉勇守禦賊至奮擊居民得全後賊大至眾寡不敵奎陣亡子之允亦同殉難

縣志 舊志 義行 新移

陳濟世字斗華五河歲貢任沈陽訓導致仕歸里崇禎十六年流賊破城濟世曰不能殺賊當守不能守當死與妻趙氏端坐

明倫堂罵賊而死

江南通志

國朝乾隆四十一年

賜祀忠義祠

勝朝殉節諸臣錄



國朝周永緒字繩武盱眙人順治六年進士歷官廣西副使李定國陷桂林乘勝破平樂執永緒不屈死

贈光祿寺少卿

一統志以上舊志

俞舜卿盱眙舉人官湖北漢陽府知府粵匪陷城死之世襲雲

騎尉

泗州志以下新修

周祿天長武進士湖北守備咸豐元年調湖南防堵髮逆守東安縣城陣斬悍賊數百擒賊首蔣瑣等歷守零陵永州前後七十餘戰三年調回湖北收復麻城剿賊磯窩塘角皆有功洊擢參將五年防堵小軍山髮賊圍營力戰陣亡子從九承襲尋該遇賊死於同治七年奉

旨議卹准於原籍及死事地方建立專祠子承鑾附祀

天長縣志胡鑾智奏案

張毓林盱眙拔貢任溧水知縣帶練擊賊陣亡世襲雲騎尉

縣志

周濬盱眙副貢官泰州州同咸豐八年在揚州殉難世襲雲騎

尉

盱眙志

吳得一泗州虹鄉廩生咸豐八年同從九品楊秉鏡監生吳振來武生陳兆位張金標防堵捻逆於吳家道口陣亡又李國佑郭德仲許上志王更新朱義尊防堵高家集均陣亡

虹鄉志

楊步鼇盱眙人天長汛把總咸豐八年天長城陷力戰死之

盱眙志

縣志

陸梓林天長舉人咸豐初倡辦西鄉團練八年髮賊來犯城陷梓林集團規復不克與王立勛王建勛等死之閩門十四人殉難同時監生洪文燦率子錡鑿鑿從九品王楚亭文生陶章培率姪必爽必然均陣亡並各全家死之又高巨川王汝爲陸履

箋張國有陸長年汪嗣紳周湘江李森林楊子杉均各闔門殉  
難梓林文燦銜鑿汝爲國有照庫亡例

賜卹餘旌卹各建專祠專坊

天長縣志

曹蘭臺天長增生咸豐八年同文生曹蘭汪曹蘭亭禦賊陣亡  
全家殉難同時文生胡德森監生施聞璈許元琪民人劉長林  
刁順成范心成杜保疆辛長淮張興劉學升蘇殿元傅宏戴必  
純楊大成俱各禦賊陣亡闔門死之

天長縣志

胡慶餘天長文生成豐八年團練禦賊與光祿署正何善延監  
生王宗仁王永江從九品戴永安文童崇十夫邱瑚武童胡映  
玠民人何天祿毛步升王慶星胡烜杭桂林吳壽榮周志祥許  
金許明吳松林楊湘及王定邦等二十人王廷芳等十九人李  
學灝等九人虞國榮等七人田大藻等十二人均陣亡

天長縣志

崇國品天長歲貢教諭咸豐八年率子監生廷樹帶勇禦賊均陣亡同時從九品胡榕率子丙益炳頤增生徐林春同武生董培元張開甲監生張振甲張梓等二十二人衛守備何恆清率子訓導棠及弟文生恆濠並弟瑕從九品何書盤何玉章等九人從九品李昱率勇李宏淵等二十二人增生朱大邦率勇朱桂堂雍世蘭等十二人從九品徐培德李厚章監生高殿邦武生薛正邦均殺賊戰死照陣亡例

賜卹仍入總祠總坊

天長縣志

陳錫福泗州文生寄居盱眙咸豐九年粵匪犯盱眙督練堵禦死之

泗州志

于夢桂梁克敏孫佩蓉孫佩蓮樊紹連王廷和郭紹周丁希言于家林俱泗州虹鄉人咸豐九年堵剿捻逆於北橋陣亡又王

道蕩王道奇王道大王道敏防堵草溝圩均陣亡武生朱景齊  
劉夢蓉克復屏山圩王懷揚劉文鳳黃玉海王玉瑚張大寬王  
廷堯劉伯仁劉達士趙如玉張朝文吳憲位沈紹燦徐士磐俱  
以練總隨營剿賊陣亡

虹鄉志

杜連魁盱眙人舊縣汛外委咸豐九年同武舉江墀於培根從

九品顧官山先後禦賊被戕俱世襲雲騎尉

盱眙縣志

周振采盱眙貢生同廩生宋慶元楊懋元增生張如瑛文生傅  
式金潘琮周秉成葛士松何德元吳鍾奇江選堂許健行葛所  
知朱權葛大椿葛大猷葛澄蘭曹煥曹鼐曹坡均禦賊陣亡俱

廕雲騎尉

盱眙縣志

趙之屏張佩珂俱五河監生同武生張冠英童生黃錦泰韓如  
珩等均圍練禦賊陣亡朱連華一門七人朱如泰一門四人均

各殉難許循求年七十八矣以勸賊歸正死

五河縣志

毛賜榮盱眙文生成豐九年擒賊至率子副貢霈若孫文生玉

榮等一門殉難

盱眙縣志  
英翰奏案

朱錦標五河武生知兵有膽略從袁甲三剿捻加六品銜成豐  
八年在籍禦捻田家莊前隊失利錦標力戰獲全遂總領西南  
鄉國防訶知蚌堡大姓通賊擊逐之進擊賊於窪子沖迫斬數  
十級又擊賊三堡走之復擊賊三沖溝斃賊數十溺死無算七  
月賊撲姚官集戰於郎家湖勝之團眾先歸錦標殿中伏死

五河縣志

杜世榮盱眙監生成豐九年同文童桑秀舒禦賊陣亡

胡肇晉奏案

李連登盱眙人候補千總署盱眙把總成豐九年城陷同外委

姜萬全于澡元周采芹訓導何國楨從九品宋燮元楊敦元許

純高李志李大文楊承業俱死之均世襲雲騎尉又文生張承煜程積何懷元黃則忠王珮蘭劉業廣汪兆熙俱同時殉難均

蔭雲騎尉

肝始縣志

郎保和天長人從九品咸豐九年髮賊來犯城再陷保和帶勇接戰殺賊無算與監生李泰交等四十六人俱死之同時文生張琳監生張瑛張梓徐輝曹拭葉國楨等十六人率團丁軍功康秉耀黃防山等二百五十一人力戰陣亡均照陣亡例

賜卹仍入總祠坊又孝廉方正程祖武從九品王賢陳卓吳安益貢生王載榮文生施晉升魏楚金胡德新於元勛韓學詩韓學潮曹召棠監生周世英張立亭韓玉田梁萬桂武生戴雙林梁國慶均照章

賜旌入總祠坊

天長縣志

胡自新天長人從九品銜咸豐九年同子琨率眾拒賊陣亡同

時孫流年孫華年等率團一百餘人及童生崇履信民人周洪

繆玉和王玉符王宗福王宗傳杜如珍婁德培俱陣亡徐和率

二子三孫隨剿閩門死之天長縣志又徐璧一門八口殉難胡聲

毛玉清天長監生成豐十年帶勇隨官軍攻城陣亡已而賊詐

降胡鏡隨義勇入城陷歿天長縣志

許師喜泗州進士官河南商城知縣咸豐十一年在籍率練迎

剿髮逆陣亡世襲雲騎尉泗州志

許宜學泗州文生成豐十一年同廩生吳天池文生李繡麟監

生韓翥屏民人許杏芳李登凱李全照等率練禦捻賊被害同

死者百五十三人宜學蔭雲騎尉泗州志

曹部字晉階泗州虹鄉廩生成豐十一年同增生朱錦章廩生



孟傳塾附生程亮工從知州鄭沅督練剿賊陣亡均蔭雲騎尉

附祀鄭沅專祠練總楊景升亦以同日陣亡附祀

虹鄉志

周占魁泗州虹鄉武生咸豐十一年同周廷璠妻鳳章楊廷贊

蔣學廷陶興德妻大志堵剿捻逆於周家圩均陣亡

虹鄉志

陳東霞五河文生咸豐間與張學周徐義倡辦團練殲賊多名

力竭死之張學周徐義馬京台任珮蘭張學典張學祥王守謙

均各全家死難

五河縣續冊

陸祥生天長從九品咸豐十一年與附貢虞國相監生胡紀堂

張世榮何朝觀武生董

一作董

雙林等十四人隨楚勝營剿賊陣

亡均照陣亡例

賜卹同時廩生崇家鑫增生姚名桐邱駿發周瓊文生曹德王士傑林

啟祥趙崇德潘太泉朱德恭武生朱元福陶克信貢生王瑄

生張維新等均照章

賜旌並入總祠坊

天長縣志

魏錫珽泗州人從九銜同治元年與武生張占春從九品陳統

三督練禦擒賊於馬公店俱死之殉難者八百餘人顧兆鴻率

練擊賊勝之窮追被害

泗州志

劉嘉珩泗州人六品軍功同治元年同文生成正川羅建唐張

啟昌武生陳廷梁監生王遐昌蔡鏡堂童生洪其昌祝鎮江姚

廷方程濟侯文蘭俞肇蘭費有太淦世緯趙萬成王起詩龔定

邦于德培韓永和郭永昌許從先許法先李如林薛玉圖宋德

豐薛玉隆侯瑞林侯瑞雪侯瑞峯侯杏春朱國仁謝永泰呂兆

元先後率練拒擒匪被害同時陣亡練丁五百九十二人

泗州志

吳長友天長人咸豐十年從多隆阿剿除陝南捻匪襄北髮逆

累保把總同治二年從征陝西大荔之羌白鎮王開村等處與

軍功六品張光福均戰歿

天長縣志

張寶珊字小槎五河文生官刑部主事同治二年從李鴻章剿

賊蘇滬中火藥傷亡蒙

賜卹知府銜蔭子縣丞

五河縣志

李全修李信斯俱泗州文生同治五年督練禦捻遇害

泗州志

杜英士天長人從九品同治五年在鍾祥縣豐樂河擊捻陣亡

十二年請

泗州蔭  
奏案

重修安徽通志卷二百十八

人物志

儒林

仁宗睿皇帝時三省教匪平行聖公孔慶鎔上疏入賀

仁宗手詔褒答曰願卿昌明正學正學明邪說自熄大哉

皇言正學者孔子之學而漢唐宋儒衍之以扶植禮教者也溯自嬴氏焚書典禮蕩盡賴漢儒起而救之遷固所以創述儒林魏晉六朝清言詖辭淫於佛老賴唐儒韓愈闢其謬而起其衰至於五季壞亂極矣賴宋諸儒出而昌明之故宋史判道學儒林爲二以明伊雒淵源上承洙泗儒宗統緒莫正於是所關於世道人心甚鉅明初諸儒皆朱子門人之支流餘裔師承有自矩矱秩然嘉隆而後篤信程朱不遷異說者無幾人亦未聞有專門經

訓名家者明史所謂科舉盛而儒術微殆其然乎我

國家

聖

聖相承崇儒重道以昌明正學望諸儒生徽國爲朱子之鄉大江南北

眞儒接踵前賢往矣其流風餘韻猶有存者述人物志儒林傳

安慶府

宋朱翌字仲新舒州潛人漢桐鄉裔夫邑之後以太學生賜第  
初爲溧水簿高宗南渡爲祕書監屬預修徽宗實錄時范冲領  
史局翌剛潤功居多秦檜逐趙鼎以鼎黨貶韶州倡明理學粵  
東化之在韶十九年召還遂卜居鄞嘗作信天緣堂記周必大  
論其詩似杜牧之而出處亦相類號省事老人文集四十四卷

浙江通志  
萬姓統譜

按江南通志以朱翌爲廬江舒人今從四庫全書提要萬姓統譜作舒州人

吳棫字才老舒州同安人

韻補徐夔序及王明清揮塵三錄

宣和六年第進士

召試館職不就紹興中爲太常丞以爲孟仁仲草表忤秦檜通判泉州所著有書禪傳毛詩補音論語續解考異說例楚辭釋

音韻補

四庫全書目錄

宋史藝文志

新脩

方聞一舒州人淳熙中爲郡博士時溫陵曾種守舒州命聞一輯成大易粹言十卷所采二程子張子楊時游酢郭忠孝及曾種師郭雍七家之說今忠孝之書不傳賴是書以存也宋藝文志及朱彝尊經義考誤爲曾種作故聞一之名不顯

四庫全書提要

按安慶府志懷甯縣志俱不載今賴四庫全書攷是書之序而知爲聞一作顯晦固有時也

嚴敬字莊人宿松人事母以孝稱宋子在松敬以禮謁同至白鹿洞講易反覆詢之自是益有所得歸著敬心銘卒年八十七

安慶府志

郝傑字元英宿松人南渡後江北多警傑奉檄從軍不得志聞

朱子在松急歸求見遇於新安嶺上欲然心折遂私淑於門人

受學著策百篇惜年未三十卒

安慶府志

元王幼學字行卿望江人生於宋季幼罹兵禍俘掠至河南陳

氏養以為子乃命之學勤苦博覽業遂大進元至元閒歸望江

耕慈湖之阪講道不輟所著有通鑑綱目集覽始於大德己亥

迄於延祐戊午積二十年七易稿而編始成卒年九十三

幼學自序

江南通志

方用字希才望江人少負逸才與揭傒斯朱公遷歐陽圭齋同

游於許謙之門以羽翼斯文相砥礪時稱許門四傑著有先傳

宗旨茗谷叢說諸書子三人以詩禮世其家

江南通志

明何瑋字宗堯桐城人正德辛巳進士年二十時卽以斯道  
任官南兵部主事有直指魏金慮其不受戒使者致而去瑋  
辭不得乃易錢周九市之句者曰代直稍爲惠耳後以忤中  
歸凡從游者告以稽古明道立法善俗爲先生平慕曾子之

作日省錄因以省名齋人稱省齋先生

江南通志

程程字用憑懷甯人積學勵行設教里中遠近就學者數百人  
時良知之說盛行程獨守河東之教誨人專以踐履篤實爲  
嘉靖中以歲貢知臨武縣有惠政乞休歸子敬思以舉人知  
雲縣聞程得請亦乞養歸值歲大祲發困以貸次歲復歉悉  
其券後數歲稔民皆擔負以償無負者以此見里人亦薰其



而善良云

江南通志  
安慶府志

雷鳴春號龍舒懷甯人嘉靖己未進士知孝感縣奏最擢刑部主事轉工部出守南陽多治績升右參議致政歸平生篤學古治禮經以講明理學聞二氏爲己任著有雪雲樓集禮經注

疏等書

安慶府志

金道寓字晴嵐潛山人少孤以學行著聲構竹浪館率諸弟讀書其中晚年精心濂洛之學著有朱陸異同辨竹浪館集

通志

金道器字達生潛山人博習羣書破產積書三萬卷沈酣其中初慕陸學以簡易悟入後乃豁然曰無戒慎功終屬影響始專讀朱子書因知尊德性不能離道問學而耽空守寂不特有背程朱亦非象山之初自也自是學愈醞粹

江南通志

胡文翰字汝學望江人從游於王守仁嘉靖閒以舉人知崇安縣用德教代政刑致仕歸益以倡明道學爲己任巡撫耿定向嘗詣文翰講論累日而去

安慶府志

張翰如字瑞翔桐城庠生博精易學著周易疏桐學易者多出其門

安慶府志

涂榮臺號望軒潛山庠生少從其從父皖川講孟子浩然之氣一節退而著知言養氣論皖川甚驚異之長而閉門授徒不求聞達其學以省身克己爲要著有克己錄四書辨疑性理集成諸書卒年八十二同邑丁言字百行少以理學自勵以恩貢入南雍與歸有光爲金石交所著不寐錄直參濂洛之微晚知內鄉縣時稱循吏有慎菴文集二卷

江南通志  
安慶府志

顏素字質卿懷甯人萬曆甲戌進士授中書自少講求性道毅

然以聖人爲可學而至丁內艱歸立意不出結廬石門窮究古  
今尤邃於易其學以易簡直捷爲宗所著有易研及詩文集後  
起南大理歷尙寶卿仕至應天府丞同邑王宗文字敬之師事  
素嘗謂大道如路之直卽事可以見性因物可以見道又桐城  
諸生錢志立者亦師事素母卒出所作舉業焚之泣曰佔畢半  
生爲老母也今已矣自是闢館授徒倡明理學其講易諸說今

散見於輔仁遺編

江南通志  
安慶府志

吳嶽秀字幼鍾懷甯人萬曆庚辰進士授中書與同年顧憲成  
等講學東林以道德文章相勵遷給諫直聲震天下以忤權貴  
出爲右布政尋乞歸築方丈室改號遜齋晚年謂湛若水隨處  
體認天理之語爲入聖之門大書於室用以自警

江南  
通志

童自澄字定夫桐城人萬曆閒布衣初見張飯夫卽毅然志學

嘗自言曰泰州起布衣爲餘姚高足彼丈夫也遂交四方講學之士建鞠仁會館以處門弟子坐臥一小樓怡神養氣年至八

十四

江南通志

吳應賓字尙之桐城人母孫氏夢飛星入口而生少誦千言博覽羣籍成萬歷丙戌進士官編修以日省告歸家居四十載惟閉戶著述闡發性命之旨同里左光斗方大任皆以理學薦特召不赴上疏極論時政上嘉之著宗一聖論十篇性善二書學

庸論語釋行世

江南通志

方昇字寅陽懷甯庠生言笑不苟讀書必焚香盥手然後展卷其訓子弟及從游者日程純公教上蔡以靜坐卽主一無適之旨也寒暑惟手性理一編晚歲尤精易學

安慶府志

趙銳懷甯人嘉靖庚子舉人知建甯縣擢均州知州素少宦情

乞休歸銳幼警敏師事桐城何瑋精尚書嘗著論稱顏子去文歸樸晦明用愚孟子鍊心於事理中告子制心於事理外朱陸殊塗同歸凡數千百言瑋嘗自許爲聖門之狂而謂銳爲聖門之狷一時同學者皆稱爲趙夫子

安慶府志

方學漸字達卿桐城人萬歷閒明經不仕初年十三時卽有志洛間之道後講學桐川秋浦開揭性善之旨弟子常數百人著有易蠡性善釋桐彝邇訓桐川語心學宗諸書平生孝友篤行致庭樹有連理之異有連理堂集門人私謚曰明善先生

江南通志

安慶府志  
井方氏詩輯

姚希顏字崇孔桐城諸生貧而能樂與方學漸講學桐川會館歲大饑采浮萍爲食晏如也

安慶府志

方大鎮字君靜學漸長子也萬歷己丑進士授大名府推官平

反疑獄活百三十人擢御史疏陳五事具言章奏寢閣破稅害  
民巡撫罷職數年不代內府採權耗費無已皆切中時弊巡鹽  
浙江嚴政大理吳越白糧爲民累具疏裁革又特疏爲陳獻章  
胡居仁請諡天啟初進大理寺少卿與郝元標馮從吾等講學  
首善書院既爲羣小所排斥遂乞休隱白鹿山與門人講學不  
輟作居敬論六篇及荷薪義田居乙記易意詩意禮說諸書因  
母歿哀泣過傷廬墓而卒年已七十矣門人私謚爲文孝先生

一統志  
安慶府志

劉若實號霜石懷甯人以國子生官鴻臚丞尋告歸雅嗜讀書  
窮理手錄孔孟周程書晨起拜之然後端誦顏素以易研授之  
遂遂於易往見方大鎮大鎮問曰論語首揭學字所學何事對  
曰有子注脚甚明非學天學聖但學爲人而已大鎮歎賞

安慶府志

趙鴻賜桐城人武長子也好讀書淹貫六籍旁及百家師事羅汝芳開宣祕洞會延及多士爲陋巷會戒以衍新建良知之旨著有海鷗吟及無甚高論跪石齋稿子士先守先訓閉戶著述

有晚研堂蝶園諸集

安慶府志

方際明字奉嚴宿松人與左光斗瞿九思相友善其學以實踐爲指力闢異端居喪秉禮不用僧巫著有治心錄訓兒錄冬青

園諸草行世

江南舊通志

李之讓字太初太湖歲貢爲桃源教諭歲旱民多饑死縣令猶督捕賦之讓泣請不聽遂棄職歸益精求性命之旨著有易解枝言沁沁集等書性至孝母歿泣血三年凡遇忌日無不泣踊

安慶府志

劉若宰字退齋懷甯人崇禎戊辰廷試第一以宮允充日講官

會講修己以敬章反覆陳說上徹僊斜倚御坐乃旁引五子之  
歌曰爲人上者柰何不敬上爲端坐聽之聞母疾五疏乞養情  
詞悲切上爲動容允歸母歿以哀毀卒

江南通志

方以智字密之桐城人孔炤長子也崇禎庚辰進士授檢討孔  
炤撫楚討賊楊嗣昌惡其異己以事逮下詔獄以智伏闕訟父  
冤膝行沙堰者兩年帝爲心動孔炤得減死都城陷爲賊所執  
脫身回南聞馬阮執柄不入流離嶺表隱於方外僧名無可學  
者稱爲愚者大師卒於萬安旅舍生平博極羣書天人禮樂象  
數名物以及聲音文字靡不淹貫所著有周易圖象幾表通雅  
物理小識諸子燔瘠切韻聲原烹雪錄浮山全集凡數百卷

方孔炤傳  
安慶府志

容若春懷甯歲貢任徽州府訓導著有今易圖學心法釋義十



卷  
按前  
縣志

國朝劉餘清字不疑懷甯人幼聞其父若實講隨處體認天理之語遂沈酣理學初游於方大鎮吳應賓之門後受業於姜曰廣排異學其患難爲高弟舉賢良方正不就晚以歲貢爲蕪湖訓導值裁缺諸臺司推重餘清特請畱蕪湖一員蓋異數云所著有易問太極說西銘解諸書

江南通志  
安慶府志

方鯤字羽南桐城人少爲名諸生長而研求經學謂詩文小道非儒者所急會豫章葉兼山講易桐城鯤盡得其學推河洛縱橫之圖以測古人制樂用兵之意著有易盪二卷黃道周何楷皆歎爲從前所未有

江南通志

陳朝棟字礪石桐城諸生幼讀論語孟子卽謂聖賢可學長而殫精宋儒諸書以大道務在躬行生平孜孜惟求寡過著清越

樓日錄三餘露箋等書

江南通志

王瑜字石仲桐城人志在窮理盡性發明先聖之旨視功名富貴泊如也順治中以歲貢官上元訓導所著有皇極通書詮解

安慶府志

蔣延姬字孔緒懷甯人家貧嗜學隱居教授晚年益深明性理

所著有視履考門山草堂集

江南通志懷甯縣志

朱書字字絲宿松人康熙癸未進士選庶常授編修纂修佩文

韻府

賜松花岡硯及鹿雉魚等物辰入酉出積勞成疾

上賜問遣太醫診視蓋異數也卒於京邸所著有恬齋詩文集松鱗堂

偶鈔古南嶽攷日記記聞漫記寒潭瑣錄行世生平爲學以復

性爲主格致誠正爲歸方苞最推重之及卒爲撰墓表

安慶府志

松縣志

徐穀瑞原名穀少字展成懷甯人康熙戊子舉人雍正間

上親揀民牧敷陳愷切稱

旨賜改今名授文安知縣在任三年以儒術飾吏治邑人至今思之著有四書圖攷古學體式攷經史疑問天文管見星學指南方言訂訛字音辨略百家闢謬見聞隨筆誦芬堂詩古文若干卷

松縣志

周大璋字聘侯桐城人雍正甲辰進士知龍陽縣改華亭教諭嗜古力學精研儒先性理之祕窮究諸史百家之書著有四書精言四書正義左傳翼朱子古文注行世

桐城縣志

胡宗緒字襲參桐城舉人薦充明史纂修官成雍正庚戌進士特旨授編修旋遷國子監司業宗緒少孤母潘氏自教之不許讀無用

之書故自經史外殫心天文地理以及律運兵刑六書九章禮儀音律之學無不洞悉源委所著有易管增注禹貢備遺同文形聲故簡平儀等書行世

桐城縣志

馬翮飛字震卿桐城人研窮六經暨朱儒書渙然有得乾隆初有欲保薦應

制科者辭不就親歿廬墓有讀易錄禹貢初輯翊翊齋筆記及詩文

鈔若干卷子春生茂貢幼奉庭訓工詩古文詞尤邃三禮著有

羣經擇義延景堂詩鈔

桐城縣志

張必剛字健夫潛山人乾隆壬戌進士知澄邁縣未幾告歸鍵

戶著述所著有三禮會通二卷其郊社辨謂不與圜丘方澤混

据郊特牲周禮以證鄭康成之是王肅之非其說最確又有濬

元書十六卷子綱能世其學著有古學發微偶編

四庫全書存目 潛山縣

吳直字生甫桐城人乾隆丙辰舉人潛心義理之學著有四書

雜辨五卷學庸釋義六卷皆辨明諸儒之說不合於朱子者又

有經義藥石四卷學庸附贅書二卷詩古文凡六卷

桐城縣志

葉酉字書山桐城人乾隆己未進士選庶常授編修歷升國子

監司業右春坊庶子典試河南視學貴州湖南以得人稱在貴

州裁汰新進陋規士林頌之所著有春秋究遺詩經拾遺易經

補義行世

桐城縣志

姚範字南青桐城人乾隆壬戌進士選庶常授編修充三禮館

纂修甲子順天鄉試同考官是時同鄉張氏方盛範以學行自

高無所依附在翰林不十年遂歸爲文沈邃幽古務求精深不

事華藻又以考據義理兩家互相譏詆其流弊至無所歸故於

學無所偏主自經史百家天文地理小學訓詁無不精通條貫而踐履爲實一以程朱爲歸所著有援鶉堂詩文集經史子集

筆記四十六卷行世

桐城縣志

姚鼐字姬傳桐城人乾隆癸未進士選庶常改兵部主事尋補禮部典山東湖南鄉試累遷刑部郎中爲四庫全書纂修官以疾乞歸鼐工古文康熙間方苞以古文名於時同邑劉大櫟繼之鼐世父範與大櫟善鼐本所聞於家庭師友聞其論文根極於性命而探原於經訓其爲學集漢儒之長而折衷於宋詩宗七子倣王士正古體選爲今體選世皆以爲精當嘉慶十五年重赴鹿鳴宴

恩加四品銜卒年八十五所著有九經說十七卷三傳補注三卷法帖

題跋二卷筆記四卷惜抱軒詩文集四十卷

桐城縣志

楊家洙字東川懷甯歲貢少雄於文晚乃獨究經義尤深於易著西樓易說十八卷既成作書致其友江濬源謂講章行而六經晦易與春秋尤甚今易說成書亦庶幾闡其歸趣正其舛謬補程朱之所未備家貧未梓歿後十餘年濬源取而稍加裁節欲爲之刊行亦未果

懷甯縣志

錢彝字秉之桐城人專治宋學嘗曰五倫之外無理六經之外無學中年而後不應科舉專意著述有易槩書槩詩槩周官槩儀禮槩禮記槩四書槩孝經槩共二百二十四卷藏於家又有經疑七卷其門人吳士驛梓之以行世

桐城縣志

汪德鉞字萃齋懷甯人嘉慶丙辰進士選庶常改禮部主事升員外郎保薦御史充會典館總纂以事奪職旋需次銓部閉戶讀書日有劄記所著有七經及論語大學偶記十餘卷語錄四

卷子史偶筆家訓女範詩古文各二卷德鉞篤信宋儒書然實  
潛心考据其所著尚有詩經文詞異同攷三國志補注惜未之

見

懷甯  
縣志

馬宗健字器之桐城人嘉慶己未會試中式辛酉

廷試成進士僅一年而卒所著有左傳補注博徵漢晉諸儒之說  
已行於世又有毛鄭詩訓詁攷證周禮鄭注疏證說文字義廣  
證戰國策地理攷漢南海鬱林蒼梧合浦四郡沿革考校經堂  
詩鈔若干卷藏於家

桐城  
縣志

吳詢字重約桐城諸生幼讀論語卽謂古人可學而至作儒佛  
仙論眾咸異之長而究心宋儒諸書以易爲五經之源研窮圖  
象有六對四分諸爻各變發古人所未發著有四書講義周易

語錄逸語詩文集

桐城縣志  
以上舊志



周家謀字姜祀太湖歲貢任崑山訓導以行克敦倫學能探本

題准祀鄉賢祠著有茗巖詩集太湖縣志以下新修

胡國鈺字鉉五桐城歲貢少喪母事父及繼母以孝聞長教授

鄉里好讀程朱諸儒先書致力於聖賢之學晚年探討愈精著

有大學指南及詩文十餘卷子田字雍則能承其學同時方日

新字閑阿孫學顏字萃農俱宗程朱之學與國鈺友善稱桐城

三隱桐城縣志方宗誠文集

潘介字幼石懷甯歲貢以文行見重於時桐城方苞交以師友

之禮著作甚富今存敘記論說雜文數十篇懷甯縣志

周卜政字時亮桐城進士淹貫經史講身心性命之學一歸中

和著經訓解三禮會通左氏詳注史斷四書講義易經講義文

詩雜說桐城縣志

李時溥字博齋懷甯舉人壽州學正規行矩步語無妄矜博覽  
典籍尤肆力於經著有經義考實春秋地理考實

國朝地理圖考天文圖考算學精蘊等韻解

懷甯縣志

吳庭輝原名泰臨字振行桐城進士歷官四川知州道光九年  
以疾歸庭輝爲政一本儒術實心教養化頑爲良蜀人德之去  
而見思家法嚴謹五世同居婚喪悉遵禮制力矯華靡爲鄉里  
式接引後輩溫然如老諸生年逾八十經史不釋手所著有讀

書說蝠山遺訓

桐城縣志

許鼎字玉峯桐城人事父母有孝行所學以程朱爲宗居鄉教  
授嚴幼儀而以身率之著有正志錄正學錄

蘇梓元文集桐城縣志

方東樹字植之桐城增生自少力學博覽經史能詩文中歲研  
究義理成待定錄百餘卷著漢學商兌辨道論跋南雷文定以

砭姚江山陰之失晚年益窮性道之旨又撰有大意尊聞書林揚解一得拳膺錄進修譜文集詩集等十餘種

桐城縣志蘇惇元文集

徐璈字六驥桐城進士由戶部主事改知縣歷浙江壽昌山西陽城興利除害攷校學宮禮器音律表章先哲振拔寒畯年六十告歸兩縣民俱立生祠璈於書無所不讀著有詩經廣詁屬景錄河防類要黃山紀勝楊亭詩文集及編輯桐舊詩集凡九

十八卷

桐城縣志方東樹文集張遇春陽城徐璈祠書事

潘大濟字用楫太湖舉人自幼志學卽嗜程朱遺書著有改過遷善主靜慎動主敬存誠居仁由義八箴內行純篤交誼有始終教授生徒一準禮法鄉人式而化之著有端本堂詩文集

太

縣志

石葆元字聿臻宿松進士授編修嘉慶庚午貴州正考官辛未

乞養歸父卒遂不復出生平無妄言戲動嘗謂居處恭執事敬  
與人忠三語終身受用不盡詩古文詞力歸醇正著有清貽館  
遺稿卒祀鄉賢

宿松縣志

汪桂月字養園宿松貢生舉孝廉方正所學以守身爲本及物  
爲用實能踐履之著有養園隨筆亦寄齋文存摭抱軒詩鈔卒

祀鄉賢

宿松縣志

石廣均字方墀葆元之子受學於汪桂月以聖賢之道相助成  
道光丙戌進士授主事尋乞養歸居憂哀毀盡禮尤以繼志爲  
孝凡義舉費數萬金治家整肅一言動皆足爲法槩性理諸書  
之精粹著內訟齋隨錄人譜詩箴亦園遺集亦園詩鈔卒祀鄉

賢

宿松縣志

馬守愚字古城懷甯人少孤力學實事求是自填籍以至

國家掌故及算數醫卜星命堪輿樹藝畜牧究心編錄而治經尤以禮爲主事父母孝事兄恭謹兼容汎愛未嘗私言人過和易有威族黨畏服咸豐初元舉孝廉方正不就粵逆之亂守愚倡辦團練迨克復後興復學校恢廓考棚助立書院捐置義學年七十一卒著有知艱錄義學規條二五陳敷啟蒙忠義小傳風

節井遺骸考

懷甯縣志

蘇惇元字厚子桐城監生舉孝廉方正年三十時心好朱子之學後師事方東樹學術一歸純正家貧甚一介不妄取與道光戊申己酉水災助知縣唐治籌畫賑濟鄉里因得實惠所著有四禮從宜張履祥方苞年譜遜敏錄課蒙津指欽齋詩文鈔子求敬字懋甫諸生篤孝純謹以哀毀成疾卒著有詩經序傳擇參書紳錄愧學錄復菴詩文鈔澄園日記

桐城縣志

朱道文字魯岑桐城附生豁達有經世志憂深慮遠往往於詩文中發之母趙年九十餘道文亦老矣孝養如孺子晚遭寇難家屬遇害道文絕而復蘇甚貧日不再食終不受非義財其學以程朱爲準則所著詩學易學及詩文門人蕭穆蒐輯爲遺集

八卷

桐城縣志

胡笥字東潭桐城增生少孤事兄以友愛稱居鄉有義行講求經術通達治體著中庸釋經四書溫故所知錄周易溫故所知錄禹貢考洛誥考守望要略詒翼堂文集

桐城縣志方宗誠文集

重修安徽通志卷二百十九

人物志

儒林二

徽州府

梁胡明星黟縣人天監初爲太學博士賀瑒舉助修五禮遷太常卿武帝崇尚釋氏宗廟以麩爲犧牲上疏切諫不聽又與朱异不合棄官歸

萬姓統譜  
江南通志

宋俞易直字平叔歙縣人元豐登第爲彭澤尉以母老歸清修苦操臨歿郡守曾諤命其屬往視問以後事答曰棺已具衣已浣方屬妻子耐葬先塋不爲齋具此外無所須也曾遣吏齋錢五萬供湯藥不受曰吾生平貧豈以五萬變吾志哉

萬姓統譜  
江南通志

時伏闕上書乞斬蔡京童貫等六奸臣復李綱相位聲震中外

尋授承信郎 萬姓統譜 江南通志

朱松字喬年婺源人第進士胡世將謝克家薦除祕書正字趙

鼎為相進校書著作郎歷司勳吏部郎中以議和議忤秦檜風

御史言松懷異自賢出知饒州嘗自謂性褊急害道取古人佩

章之義名其齋曰韋齋有韋齋集十二卷元至正閒追諡靖獻

宋史朱熹傳 江南通志

程大昌字泰之休甯人紹興辛未進士著十論言當世事擢太

平州教授孝宗即位遷著作佐郎累擢至權禮部侍郎直學士

院出為浙東提刑力拒酒稅增額之議徙江西轉運副使奏蠲

漕運積稅歲歛出十萬餘緡代輸贛吉臨江南安夏稅復清江



縣破阮桐塘二隄以杜水患累遷至吏部尚書出知泉州汀州  
賊沈師作亂閩部大震檄統制裴師武討平之遷知建甯府以  
龍圖閣學士致仕卒諡文簡著有禹貢圖論易原雍錄易老通  
言攷古編演繁露北邊備對行於世

宋史本傳

吳儆字益恭休甯人與兄俯齊名時爲之語曰眉山三蘇江東  
二吳俯登乾道進士官終太學錄儆登紹興進士通判邕州張  
栻稱其忠義果斷緩急可仗薦於朝召對首陳恢復大計備論  
帥臣漕司協濟之宜遷廣南西路安撫著有竹洲集諡文肅子  
壘私淑朱子之說隱居不仕

萬姓統譜  
江南通志

吳景字叔夏歙縣人朱子歸省先塋景首執經館下得聞伊洛  
之學又從至建州就正造詣益深無意進取以薦徵爲郡校書  
不就所著有易論書說史評及詩文集人稱友堂先生

萬姓統譜  
江

南通志

汪楚材字太初休甯人紹興元年進士歷湖南安撫使幹辦公

事轉廣西運司幹官喜問學朱子與吳敞皆器重之皆以聖門

爲學之工夫次第及佛老之弊遂以儒碩知名

高姓統譜

程洵字允夫婺源人問學於朱子嘗以道問學名齋朱子爲易

其額曰尊德性因爲作銘相與往復問答今載於大全集者十

三書初任衡陽主簿調廬陵錄參與新使不協臺章有云吉州

知錄程洵亦在僞學之流朱子曰今日始見吾弟行止分明所

著有克齋集

一統志江南通志

王炎字晦叔婺源人登乾道乙科授崇陽簿累遷知湖州不畏

強禦邸第貴介有撓政者炎注於牘曰汝爲天子親亂天子法

炎爲天子臣正天子法人傳誦之初著易解未竟病篤乃夜祝

天願須與無死以成書病果少瘥著有雙溪類稿

萬姓統譜  
浙江通志

江南  
通志

滕璘字德粹婺源人與弟珙俱從朱子游淳熙八年中乙科調  
鄞縣尉改四川制置司幹官韓侂胄當國或勸璘一見可得掌  
政璘曰彼以僞學誣一世儒宗以邪黨錮天下善士顧可干進  
乎終不肯屈後官至朝奉大夫璘初爲論語說朱子見而善之  
既而語之曰學以變化氣質爲功而不在于多立說璘自是不  
敢輕論著所著溪齋類稿三十卷珙登淳熙十四年進士令合

肥有仁政

萬姓統譜  
江南通志

汪安仁績溪人慶元進士投學錄淳熙中率太學生三百二十

八人入奏請朝重華宮不報仕終興國軍教官

江南  
通志

錢時字子是歙縣人

宋史作  
富安人

師事楊簡以易冠漕試絕意科舉

究明理學江東提刑袁甫作象山書院招主講席學者興起以  
喬行簡薦授祕閣校勘出佐浙東倉幕又以李心傳奏召入史  
館尋告歸著有周易釋傳尚書演義詩學管見春秋大旨四書  
管見兩漢筆記蜀阜集冠婚記百行冠冕集

宋史揚簡傳  
徽州府志

金朋說字希傳休甯人淳熙丁未進士知鄱陽縣時厲僞學之  
禁凡薦舉改官悉令漕帥取狀方得擢用朋說應薦上狀言素

師朱熹講孔孟及程氏遺書實不知爲僞遂解職歸

江府志  
通志

爲初字以元休甯人淳熙閒薦爲太學錄韓侂胄用事上辨邪

正一疏不報解官歸著有寒松閣集

江府志  
通志

汪莘字叔耕休甯人爲學不屑於場屋聲病之文屏居讀易嘉  
定閒應詔陳天變人事民窮吏污之弊不報真德秀楊簡見之  
曰真愛民憂國之言也時朱子召赴經筵未至莘貽書言財不

待先生而富兵不待先生而強惟主上父子之閒所不能濟者  
待先生而濟朱子深契之所著有方壺存稟柳塘集

萬姓統譜  
江南通志

志

劉伯諶字諶甫歙縣人居父喪遵古制著理學正傳四書講說  
弟伯證字證甫以文謁魏了翁真德秀咸稱善爲之序著有唐  
史撮要左氏本末三傳制度等書真魏二人相繼論薦力辭不

仕

江南  
通志

程若庸字達原休甯人從饒魯游得朱子之學咸淳開登進士  
累爲安定臨汝武彝三書院山長吳澄程鉅夫皆出其門學者  
稱勿齋先生所著有性理字訓講義太極洪範圖說

萬姓統譜  
江南通志

志

汪暉字處微績溪人不求仕進結廬日環谷取六經諸子百家

之書日益鑽研真德秀欲薦之未果而德秀卒所著有環谷存  
藁及編纂曾子十二篇子思子九篇卒門人私謚曰康範先生

徽州府志

胡方平字師魯婺源人受易於董夢程夢程受於黃幹故得朱  
子真傳既又精研反覆二十餘年乃合本義啟蒙注通釋一書  
又爲外翼四卷與易餘閒記行於世

徽州府志

謝璉字公玉祁門人嘗從朱子講學言行醇正爲世名儒寶慶  
二年由特奏名授迪功郎爲龔州助教所著有語錄日錄

萬姓統譜

江南通志

程永奇字次卿休甯人受學於朱子居家嘗倣伊川宗會法以  
合族人又行呂氏鄉約冠婚喪祭悉用朱氏禮僞學難作避於  
邑之東山平生玩索經傳所著有六經四書疑義朱子語粹格

齋稿疾革門人問之正衣冠而起曰吾不能多言呼筆大書一

敬字而逝學者稱格齋先生

江南通志

元汪一龍字遠翔休甯人宋咸淳進士調句容尉攝縣事歲大饑做朱子南康遺規爲便民十條行之民無瘠殍淮閩李庭芝辟入幕京口瓜州不守奉母航海南歸宋亡不仕至元中起教紫陽書院闢朱子之學人稱定齋先生

萬姓統譜江南通志

胡一桂字廷芳婺源人父方平號玉齋精於易著易學啟蒙通釋一桂之傳出於父得朱氏源委之正宋景定甲子舉於鄉入元退而講學入閩求朱子緒論著周易本義附錄纂疏十五卷及啟蒙易傳三篇又作十七史纂朱子詩傳附錄纂疏及人倫事暨歷代編年諸書學者稱雙湖先生

元史本傳

陳櫟字壽翁休甯人三歲祖母吳氏口授孝經論語輒成誦年

十五鄉人皆師之慨然發憤致力於聖人之學以爲有功聖門者朱子歿而諸說亂真乃著四書發明書傳纂疏禮記集義以開朱子之說又爲讀易編讀詩記爾雅釋六典撮要春秋三傳節注資治通鑑精節增廣通略論孟訓蒙口語書解折衷諸書延祐設科有司強之舉於鄉不赴禮部居家教授學者因其所居稱定宇先生晚年自號東阜老人卒年八十三揭傒斯誌其墓與吳澄竝稱且以爲過於澄云

元史本傳

程直方字道大婺源人讀書十年不下樓尤深於易入元絕意仕進行部至者必造請或延至學宮執禮受教

萬姓統譜江南通志

倪士毅字仲宏休甯人祖父三世以經學教授鄉里毅世其學以教授於黟二十三年黟人化之學者稱道川先生生平事親至孝接物以誠與趙汭汪克寬稱新安三有道著四書輯釋三



十六卷明永樂間詔儒臣纂修四書大全實本其書又有偽書

作義要訣四卷傳於世

元史類編

胡炳文字仲虎婺源人父斗元從朱子從孫小翁得書易之傳炳文尤潛心朱子之學延祐中以薦署信州道一書院山長再調蘭溪州學正嘗作周易本義通釋十二卷其於朱子所著四書用力尤深作四書通三十四卷以剛正饒魯之說之戾於朱子者又著春秋集解禮書纂述大學指掌圖五經會義爾雅韻語諸書至大閒其族子淀爲建明經書院以處四方來學者儒風之盛甲東南世稱雲峰先生門人同邑王偁字伯武著書極博朱升素稱該洽凡有疑必日以問伯武又同郡張存中字伯庸著四書通證炳文極稱之以附於四書通之後

元史類編江南通志

程復心字子見婺源人沈潛理學會輔氏黃氏之說而折衷之

著四書章句總要章爲之圖圖爲之說至大開行省獻其書於

朝授徽州路教授以母老辭歸

萬姓統譜  
江南通志

王堃翁字太古婺源人通經工詩詞尤嗜易先儒之論皆謂陽

實陰虛堃翁則謂天氣運地形停陽虛陰實吳澄善其說扁其

室曰行易從學者甚眾

江南通志

程榮秀字孟敷休甯人幼學於方回及回以睦州附元因辭去

從許月卿受易延祐中以薦提舉浙江儒學於諸經子史悉有

記錄以家禮出朱子歿後中多未定之論復取朱子言行有涉

於禮者爲翼禮以傳焉

萬姓統譜  
江南通志

汪炎景字懋遠婺源人幼能詩長而淵源六經發揮朱子之微

旨而疏之曰四書集疏其教人必使循序漸進其文奇而有法

江南通志

吳霞舉字孟陽歙縣人父龍翰宋迪功郎編國史院實錄霞舉性孝友嘗領歙邑教事所著有易管見筮易太元潛虛圖說又有文公喪禮考異曹涇稱爲紫陽功臣

江南通志

程龍字舜俞婺源人宋咸淳進士仕睦州推官入元除永嘉縣尹轉湘陰知州以徽州路同知致仕所著有尚書毛詩二傳釋疑禮記春秋辨證及三分易圖龍以仕元非本志自號不不翁

江南通志

趙昉字子常休甯人姿稟卓絕聞九江黃澤往從之游得六經疑義千餘條以歸已復往留二歲得口授六十四卦大義與學春秋之要復從臨川虞集游獲聞吳澄之學乃築東山精舍讀書著述諸經無不通貫而尤邃於春秋以聞於黃澤爲春秋師說三卷廣之爲春秋集傳十五卷因經解有屬辭比事之語復

著春秋屬辭八篇又以爲學春秋者必考左氏事實乃復著左氏補注十卷當元末兵起汭轉側干戈閒而進修之功不輟明

初詔修元史徵汭預其事書成辭歸學者稱東山先生明史本傳

汪克寬字德一祁門人祖華受業於饒魯得黃勉齋之傳克寬

於元泰定中舉鄉薦會試以策伉直黜遂棄科舉盡力於經學

著春秋胡傳纂疏易有程朱傳義詩有集傳音義會通禮有禮

經補逸綱目有凡例考異學者稱環谷先生明初召修元史書

成將授官固辭賜銀幣給驛歸明史本傳

明朱升字允升休甯人元末鄉薦爲池州學正蘄黃盜起棄官

去太祖下徽州召問時務歷官翰林學士定宗廟時享齋戒之

禮與諸儒修女誡上之大封功臣制詞多升撰學者稱楓林先

生明史本傳

范準字平仲休甯人元末從趙汭朱升汪仲魯游學問該博爲  
文宏議開論洪武十一年以明經舉任本邑訓導擢陝西葭州  
吳堡知縣開設舊治安復流離興崇學校廉介清苦升工部主  
事卒於官所著有齋叟稟西游率稟謬稟塞白稟何陋軒稟

統譜 江  
南通志

謝復字一陽祁門人讀書不求仕進嘗負笈西陂從吳與弼游  
所得必見之躬行居家孝友喪葬冠婚悉遵古禮人稱西山先

生

一統志 明  
史吳與弼傳

汪循字進之休甯人游莊景之門與王守仁數相論辨登宏治  
丙辰進士爲永嘉知縣擢判應天正德初應詔陳內修外攘十  
策劉瑾擅政一月三抗疏請裁革中官不報罷歸

萬姓統譜  
江南通志

游震得字汝潛婺源人嘉靖戊戌進士由行人入諫垣世宗好

方士言公卿多以祝釐進震得獨昌言其失上震怒廷杖外補副使贛州分守辰州省稅權停積逋掣民壯裁調發兩地皆尸祝之歸創虹東書院講學其中著有性理纂要談藝要錄

萬姓統譜

江南通志

汪禔字介夫祁門人刻苦砥礪上友古人事母至孝著有家禮

砥俗投壺儀節彙菴遺聚

江南通志

范涑字原易休甯人萬曆甲戌進士知南城縣累遷浙江按察福建布政所至興利除害雅尚理學南中爲張江陵祝釐涑獨不赴巡撫海瑞謂南中得個半人涑其一也著休甯理學先賢

傳范子喙言晞陽文集

江南通志

余懋衡字持國婺源人萬曆壬辰進士令永新擢御史時以殿工礦稅四出暴橫懋衡疏論其害以爲十倍於加賦巡按陝西

劾稅監梁永永賄膳夫毒之不死拷膳夫得賄及餘蠱因上書  
極論永罪久之撤還關中始靖閱視固延兩鎮條上十事掌外  
計列計典七條著爲令引疾去天啟元年起歷大理寺少卿進  
右僉都御史理京營戎政進右副都御史改兵部侍郎魏闈請  
恩蔭諸弟姪及客氏子懋衡以爲非典封還兩敕升南京吏部  
尙書力辭引疾歸初懋衡於新安紫陽書院倡明理學又與鄒  
元標馮從吾構首善書院於京師旣而奸黨張訥醜詆講學諸  
臣懋衡遂坐削奪崇禎初復官所著有乾惕齋集語錄及經翼

諸書

明史本傳  
江南通志

李希士字聖始黟縣庠生少見先儒語錄云學問須心上做始  
得卽負笈入山默坐觀心後與鄒守益湛若水創中天書院講

學著有三經約言

徽州府志

金瑤字德溫休甯人以貢爲會稽廬陵丞與郡守益壽豹爲莫逆專意講學調桂林衛經歷不赴林居三十年談道闡述著有

周禮述注六爻原意十七史摘奇贊訓文集等書

徽州府志

陳履祥字文臺祁門歲貢聞羅汝芳開講南都往從之游已復師事耿定向定向極重之曰此吾老友也後授徒於金陵宛陵

從者如雲著有四書翼九經翼易會通諸書

徽州府志

游再得字汝見婺源人從學湛若水羅洪先鄒守益之門壯年卽棄諸生力學砥行嘗作四箴爲兄震得規鄉人有不善者多

畏其知所著有近思錄楚游彙蓮華山人集等書

徽州府志

程佩字以和休甯人篤信程朱之學力闢二氏侍母疾宵衣踰年及卒哀毀泣血目爲之盲所著有學庸問辨學則音韻等書

徽州府志



吳成志字儒達婺源人性孝友早孤屢父書輒涕泣不忍讀爲古文詞自成一家所著有尙書制意四書制意周易補過晤語等書同邑戴文仲字用中孝友力學淹貫六經所著有四書考尙書考性鑑歌圖學者稱草窗先生又余懋進字用之萬歷丙子舉人家貧力學不入城市著有四書解五經管窺性學質疑又吳從周字文卿萬歷中以貢歷杭州通判攝錢塘令有陳俊等十年沈獄片言折之生平尤以講學明道爲務著有易經明

訓春秋心印及語錄會編諸書

徽州府志

程智字子尙休甯人深究易理至忘寢食入徑山閉關三年羣疑悉破曰一四天地之元二三天地之交佛知天地之元意主無生道知天地之交意主長生至參兩尙數用六用九大衍五十惟儒者能之此生之爲易也著有二四一三參兩說及大

易宗旨中庸旨說諸書

江南通志  
徽州府志

江旭奇字舜升婺源諸生幼孤母余氏口授孝經小學既長著孝經翼孝經疏義崇禎初疏寫所著北游成均適駕臨太學遂奏上請補成孝經大全命題取士且請祀諸葛亮張巡岳飛於文廟詔許之授安岳丞所著有小學疏義書經傳翼朱翼檀弓

疏義漢魏春秋筆花齋集等書

江南通志  
徽州府志

江懋奇字正叔婺源人崇禎乙亥拔貢歸不就選著有尙書

約旨五經麗文史鑑捷衡性至孝母目盲同妻方氏昕夕禱天自復明又江世育郡庠生性孝友著四書正義近居錄朱王異

同辨

徽州府志

程瞳休甯人不求仕進專務實學著閑闕錄辨朱陸之異同著新安學系與朱子合者存背者去又有新安文獻紫陽風雅諸

書

江南通志

謝顯字惟仁祁門人沈慧好學家貧或勸之治生對曰治生孰若治心從湛若水學靜坐有得云此學如過獨木橋絕無倚靠立腳處督學耿定向檄祀鄉賢祠評之曰跡其所至已在善信之間充其所至不底聖人不已

江南通志

洪德常字常伯歙縣人少有遠志研心六籍及宋元明諸儒之書著中庸要領周程張朱五子學約知行合一錄養性格言次

子珣貢生授武進訓導亦以學行聞

江南通志

汪九漪字紫淵休甯人少嫻文詞晚年專精邵子易學原本廖氏以聲音爲理數統宗而參用祝氏易同之旨著續皇極經世書七音類集述其孫應銓直

南書房嘗以其書恭進

江南通志

汪佑字啟我休甯人爲學以實心窮實理實功成實修二語自警著有詩傳闡要易傳闡要禮記問答大樂嘉成四書講錄五子近思錄明儒通考星溪文集家禮儀節補訂諸書

休甯縣志

國朝吳曰慎字微仲歙縣人深潛易學著有周易本義翼周易愚旨按周易集粹文徵數十卷文徵取史以證象尤曠然於貞勝之旨

御纂周易折衷曾取其書數十則附明儒後

江南通志歙縣志

汪璉字文儀休甯人嘗講學東林力嚴陽儒陰釋之辨著有周易質疑二十卷凡八易稿而成歿祀東林書院學者稱默菴先生又有大學章句釋義周易補注學部通辨語餘漫錄悠然草

諸書

休甯縣志

張積字舍之祁門人爲文根據理要明季文體詭異多用二氏

語喟然曰理學晦矣遂棄舉業杜門窮經尊程朱斥佛老著有

石渠稿

徽州府志

江恆字于常歙縣諸生著有王學類禪臆斷一書辨別傳習錄

所論之非共百三十二則

歙縣志

汪知默字聞增歙縣人與洪德常講學德常著作皆折衷於知

默著有本書畏書篤行錄理學歸一諸書

歙縣志

胡鼎字棠明歙縣諸生絕意仕進潛修實踐與同邑汪德元汪

知默江恆講學紫陽書院既卒其門人施璜輯其遺書及詩文

行世德元字正叔由歲貢爲蒼梧令有惠政歙學者推先正必

以德元爲首

歙縣志

施璜字虹玉休甯人日以存何念接何人行何事讀何書吐何

語五者自勘教人九容以養其外九思以養其內九德以要其

成學者稱誠齋先生初璜好學不敢自是聞四方有名賢徒步千里考論同異嘗過宛陵詣施閏章侍講詰問累月歸著誠齋問對性理發明易書詩四書太極圖西銘釋注五經臆說訂學庸或問辨學彙言其五子近思錄發明小學發明二書尤爲海

內傳誦

江南通志  
休甯縣志

吳之騷字耳公歙縣人順治中以舉人爲績溪教諭遷丹陽教授分校湖廣鄉試置義田設義學以教養族人著有學經類解

桂畱堂集

江南通志

胡廷瓊字瑜公績溪拔貢授儒學教諭以父母年高不就銓兄弟六人百餘口同居無閒四子五經皆有集說其周易臆見獨尋象占本意不爲舊說所節於邵程朱三家外多有發明

績溪縣志

江永字慎修婺源人爲諸生數十年博通古今專心十三經注

疏而於三禮功尤深以朱子晚年治禮爲儀禮經傳通解書未就黃氏楊氏相繼纂續亦非完書乃廣摭博討大綱細目一從五禮之次而編輯之題曰禮經綱目凡八十八卷釐正發明足以終朱子未竟之緒嘗一至京師桐邑方苞荆溪吳紱質以禮經疑義皆折服其他如推步鍾律聲韻皆能發前人之所未發而一切制度名物稽考精審訂訛補漏實東南一大儒宗也所著禮經自綱目外有周禮疑義舉要禮記訓義擇言深衣考誤儀禮釋宮增注儀禮釋例律呂闡微律呂新論春秋地理考實鄉黨圖考論語瑣言羣經補義讀書隨筆古韻標準四聲切韻表音學辨微河洛精蘊推步法解近思錄集注考訂朱子世家及脊齋文集又因宣城梅文鼎厯算全書爲之發明訂正成算學八卷續一卷卒年八十二祀鄉賢

四庫目錄  
婺源縣志

汪紱初名烜字雙池婺源人家貧困初備於江西景德鎮爲畫碗之役以其餘閒讀書後乃博極儒經以宋五子之學爲歸因陸隴其所著讀禮志疑乃作參讀禮志疑二卷多得經意可與陸書相發明又著有周易尚書四書詮義春秋集傳禮記章句樂經律呂通解理學逢源儒先晤語行於世

婺源縣志

胡匡衷績溪歲貢以孝友爲鄉里所重力學探微於經義多所發明而不苟與先儒爲同異所著有周易傳義疑參十二卷析程朱之異同而補所罅漏多采宋元各家之說以相訂正而亦時出己見禮經則著三禮札記周禮井田圖考井田出賦考儀禮釋官等書其論井田多申鄭義而授田則以迷人爲鄉遂制大司徒爲都鄙制謂鄭注自相違背作畿內授田考實一篇列於卷首其釋官則以周禮禮記左傳國語與儀禮相參證足補



注疏所不及又著有左傳翼論語古本證異論語補箋莊子集

評離騷集注等書詩古文則別爲一編名曰樸齋文集

續吳縣志

胡玉達原名景燠績溪庠生講學梓潼山以宋五子錄及朱子

小學爲本門人得其支流者稱梓潼派著有學庸衍義性理圖

說考證小學三編考古類編崇信錄梁安關幽錄

胡在田縣志補正引梁安

著書藝文錄

新刊

戴震字東垣休甯人從江永游研精注疏及說文諸書不主一

家質之於永永大驚賞年三十餘以諸生入都北方學者如獻

縣紀昀大興朱珪南方學者如嘉定錢大昕餘姚盧文弨青浦

王昶皆折節與交尚書秦惠田纂五禮通考延震任其事乾隆

二十七年舉鄉試三十八年四庫館開徵海內淹貫之士司編

校之職震以薦充纂修四十年

特命與會試中式者同赴

殿試

賜同進士出身授庶常晨夕披檢無閒寒暑所校大戴禮水經注尤精核四十二年卒於官所著於小學有聲韻考聲類表方言疏證於測算有原象迎日推策記句股割圓記續天文略策算又有詩經二南補注毛鄭詩考考工記圖孟子字義疏證屈原賦注通釋諸書別有文集十二卷

休甯縣志

潘繼善字取大婺源副貢所著有聖學輯要讀經史筆記音律節略考等書年八十三臨歿猶索筆手書云先儒到終祇有一敬字此足以見其所得矣

西庫全書提要  
婺源縣志

金榜字輔之歙縣人乾隆壬辰狀元授修撰未幾卽移疾歸少工文詞以才華爲天下望後受學於江永遂深經術其於三禮

博稽而精思慎求而能斷爲鄭氏一家之學而不務苟同所著

有禮箋三卷行世

徽縣志

趙繼序字芝生休甯人乾隆辛酉舉人所著有周易圖說質疑二十四卷其書以象數言易而不主先天河洛之說爲圖三十有二爲說五其詁經多從卦變取象兼取漢宋之說無所偏主嘗云訓詁制度義理皆儒者所當研究者因精力不及分門別戶遂相刺謗學者不知其方則云漢宋異學其弊日甚乃著漢儒傳經記譏孔門弟子考又著經說史論及詩古文若干卷

休甯縣志

志

凌廷堪字次仲歙縣人六歲而孤旣冠始知讀書慕其鄉江永戴震之學乾隆五十五年成進士選甯國府教授著述十餘年卒於官廷堪貫通諸經尤深於禮撰禮經釋例十三卷凡八類

曰通例曰飲食例曰賓客例曰射例曰變例曰祭例曰器服例  
曰雜例禮經第十一篇自漢以來說者雖多由不明尊尊之旨  
故罕得經意乃爲封建尊尊服制考一卷附於變例之後又著  
有魏書音義燕樂考源元遺山年譜諸書其校禮堂集於五物  
九拜九祭釋牲旅酬楚茨諸說經之文多發古人所未發而尤  
卓然者則有復禮三篇

歙縣志

程瑤田字易疇歙縣人以舉人任嘉定教諭王鳴盛錢大昕皆  
推重之嘉慶元年舉孝廉方正瑤田少受學於江永篤志治經  
休甯戴震自謂遜其精密浙撫阮元聘修杭州府學樂器多所  
參訂生平爲漢學而不苟同所著書曰通藝錄治經者咸推服

焉

歙縣志  
以上舊志

洪榜字初堂歙縣人乾隆丙申以舉人應天津

召試授內閣中書粹於經學其解周易訓詁本兩漢作述贊二卷又著

周易古義錄書經釋典詩經古義錄詩經釋典春秋公羊釋例  
論語古義錄初堂讀書記弟梧字桐生乾隆庚子

召試舉人由編修官沂州知府亦選於經學同族洪瑩字賓華嘉慶己

巳進士授修撰五經各有撰述同邑羅永符

選舉表  
作尹孚

字子信嘉

慶辛未進士善讀書通經史工詩古文

先正事略  
以下新修

朱文翰字見菴歙縣人乾隆庚戌進士歷官兩淮鹽運使生平  
學優養醇以闡明聖道爲己任著有退思初稿名學類通行世  
又有退思續稿舛齋經進文存及詩集省餘筆課藝餘錄各種

歿祀紫陽書院

歙縣志

胡秉虔字伯敬績溪人嘉慶己未進士由刑部主事改官甘肅

靈臺縣知縣升丹噶爾同知卒官秉虔博通經史於小學致力

尤深著周易尚書論語月令小識卦本圖考尚書毛詩敘錄四書釋名小學危言經義聞斯錄漢西京博士考槐南麗澤編惜分齋叢錄對牀夜話詩集共百餘卷官張掖時祀前明殉節諸臣采輯事蹟著甘州成仁錄四卷

續漢縣志

董桂敷字宗邵婺源人嘉慶乙丑進士官編修與修

國史以汪紱學得朱子真傳請立專傳不果行引疾歸著有十三經管見書序蔡傳後說周官辨非解夏小正箋注諸史蠡測諸子異同得失參斷儒先語錄匯參見聞贅語自知室文詩集道光十六年奉

旨祀鄉賢祠

婺源縣志

胡培翬字載平績溪人嘉慶己卯進士官內閣中書戶部主事回籍立東山書院又掌教鍾山雲閒涇上並引翼後進爲己任

生平學無不該精於三禮積四十餘年成儀禮正義燕寢考研  
六室文鈔阮元采其說經者入

臯清經解中卒祀鍾山書院同時有歲貢胡宗翰字西園著有儀禮

析微

嶺溪縣志

孫蒙字養正黟縣人治周易分五門一易緯二易支三易流四  
易跋五易衍皆究撰灼布推加減飛行診望之法補注附說作  
表摺拾奇胲總名周易外傳凡十五卷又通音韻有易韻一卷  
元音二卷

黟縣志

李筠字煥文婺源文生少孤事母極孝投徒依小學節目講求  
冠昏喪祭之禮皆躬行之著有春秋三傳釋經五十卷讀書隨  
錄內省筆記各一卷

婺源縣志

吳崑字賢二婺源歲貢年三十時已著有易經補注書經補義

禮記集說天文考詩文集各若干卷一日自悟以爲言朱子所  
已言則贅言所未言則背遂盡焚之教人篤志勵行尤以養蒙

爲要因取胡炳文純正蒙求微其故實而句釋之

婺源縣志

程桂馥字月巖黟縣諸生學以誠正爲主其教授生徒必以孝  
弟忠信日籍所業以考得失父歿事祖母繼母如母愛弟甚摯  
而教之必納於軌交友以敦行相勉過則規之同鄉高學謙見  
而語人曰語精而顯氣肅而和非躬行心得未易有此

黟縣志

章大澤字道和績溪人兩舉孝廉方正皆不就事母以孝聞家  
貧授徒以非義餽者弗受爲學以克己爲先說經皆剴切詳明

著有易經漢魏注勸

績溪縣志

吳蘭芬字春田休甯附監生家世講學有志紹述隨父明禮入  
都爲山陽汪文端所器重南歸潛心性理之學從格致始躬行



孝友型鄉式俗以行先文後訓及門著有讀書書所見錄始畱

草詩集

休甯縣志

朱濂字理堂歙縣廩監生孝友爲鄉黨則經史淹貫尤精詩禮

博采先秦及唐宋諸儒之說成毛詩補禮六卷生平然諾不欺

以身率教

歙縣志

俞正燮字理初黟縣舉人直方敏大忠信廉介才識俱長其學主於求是其文典重手成官私宏鉅書如

欽定左傳讀本行水金鑑之類不自名者甚多自名者有癸巳類稿癸

巳存稿說文部緯校補海國紀聞而類稿爲最著其書自緯度

輿圖經疑史證以及靈素道梵方言志乘皆兼綜條貫發前人

未發之覆掌教江甯惜陰書院卒弟正禧字鼎初舉人湛深經

術尤熟史事善論文多義行與正燮齊名

黟縣志

汪文臺字南士黟縣廩生事父母最孝博學強識治經獨宗漢  
儒病宋元以後輕議六經作臚稿以正其失又著有論語外傳  
十三經注疏校勘識語後漢書輯及說文校字錄小學劄記夜  
餘錄思問錄道光間海疆警作英吉利考略

黔縣志

胡紹勳字文甫績溪拔貢舉孝廉方正以古學負盛名著有四

書拾義易春秋論語學庸孟子各箋異

績溪縣志

胡源憲字監成績溪增生品端學粹著有尙書古訓爾雅字申

孝經外史六經咫聞錄四書釋地纂

績溪縣志

胡霖浹字蘇亭績溪人有書三萬卷研究名物象數之學著有  
論語異文箋學庸淺解孟子劄記同縣有胡承澤字潤之歲貢  
亦治漢鄭氏學著有鄭氏易例四卷

績溪縣志

胡在田字雨公績溪人事親孝咸豐間負母攜子避地遇賊乞

以身貸母子嗣達又乞以身貸父皆免旋絕粒卒在田潛心古  
學著有毛詩鄭義發明八卷三禮鄭義通釋十二卷經典述聞  
四卷雲軒別錄十七卷縣志補正癸卯紀事庚申忠義錄鋤經  
室遺集各一卷

續溪  
縣志

胡銘琦字又韓績溪庠生學問淵博以母老罷舉著有鄭氏易  
旨四卷詩經箋證十卷三禮定義二十四卷爾雅規郭一卷說  
文規許三卷快齋筆記四十卷惜分軒文集五十卷

續溪  
縣志

程誥字魯菴績溪舉人博覽羣書尤篤嗜毛詩著有詩經解注  
八卷鳳山文集八卷雲广詩鈔四卷

續溪  
縣志

朱光閔字勳門黟縣諸生研究諸書尤專力朱子之學以忠信  
爲用以孝弟爲本嘗誦孝經化及婦孺一號勉齋遂以名其集

黟縣  
志

程燮臣字理之歙縣增貢純孝安貧潛心程朱之學年十九卦  
股療父病晚號居易山人爲書三種曰尊我先路曰順理則裕  
曰童子必讀書皆發明理學維持禮教之言

歙縣志

章遇鴻字可儀績溪舉人官德興知縣邃於箋疏之學旁通六  
書音韻著有周易管窺十二卷附易緯正譌二卷毛詩蠡測二  
十九卷鄭氏詩譜考源一卷說文正譌三十二卷三國志地輿  
考五十六卷同時有歲貢周成字志甫淹博精覈與遇鴻並爲

胡林翼曾國藩所重著有經史屏算

績溪縣志

洪嘉木字巽甫祁門庠生蚤歲讀書治漢學中年研究宋五子  
性理書言行一準聖賢所注四經論孟二戴禮未成惟輯有孝

經章句夏小正攷經孔子三朝七篇

祁門縣志

余龍光字黼山婺源人道光乙未舉人江蘇婁縣知縣晉崑山

捐賑水災多所全活署元和勸增豐備倉田八千餘畝署青浦  
有

至聖衣冠墓援案請給奉祀生勸捐田畝爲祭掃費并倡庭聞書  
院擒治匪類徐澹論如律續緝匪黨周立春未獲因罷官其祖  
元遵爲汪紱弟子以理學稱龍光蚤歲讀王陽明書後乃淵源  
家學潛心程朱之書以居敬窮理力行爲宗旨著有廣唐書三  
十卷朱子祠祀考元明儒學正宗錄表章儒碩錄各二卷吳康  
齋學案汪仁峰學案各一卷仁峰年譜二卷汪雙池年譜四卷  
經學管窺六卷文集二十四卷詩集七卷外集六卷又有溫故  
一得學古彙鈔短檠餘墨讀史劄記枌榆雜述存稿拙翁家  
訓論文彙語八種都六十三卷凡龍光所著書百五十卷

婺源縣志

講  
年